

編號 1 號

【線上學習】李秉璋原作

神奇、神奇、真神奇，上課毋使趕，交通毋會塞，想愛學麼个，就學麼个。先生任恁擇、時間由恁選，三更半夜乜做得，先生講到心色又分明。佢做得係學生个先生，乜做得做先生个先生，總講佢門生滿天下，毋過，毋使準備拜師禮、乜毋使納學費，你想愛學，佢就會教。

毋管你係巧神¹抑係劣拙²，佢全收。佢無擇學生仔、無擇時間、無擇所在，單單擇你，擇你想愛學个心。這係學習个革命，這係時代个轉變。來到急、來到緊，跔得著斯大進步，就像膺身脣有仙人指點樣，武功大進。

馬桶毋曉得修理有人教，鏈鋸毋曉得發，一步一步來，秘訣³教你知。網路線个接頭線路毋曉得排，有人教你色目愛分明，五花十色照順序，工具還較特別，頭尾一下摺佢夾落去，接頭插下去網路就通。

雖然講單隻銀角毋會響，毋過先生大部分係自家在該唱戲，

講到口涎波潑、精神飽滿、歡頭喜面，全毋會恹又有耐心！一遍教毋會，再過教一遍，你想愛學幾多回就學幾多回，學到你會為止。

千里緣分一線牽，天下在恁彈指間。現代生活當舒適，冷氣吹，彈指間，毋使出門、毋使尖車，想愛仰般學就仰般學。就算係疫情个時節，學校个線上教學，有屑無恁自由，毋過乜有人相當認真，一頭聽課、一頭查資料，正經係一踢三通，師傅渡入門，修行在個人。上課講義自家留，毋需抄，三隻快速鍵一撇，滑鼠一點，講義隨留下來。

當日上課記錄先生有錄製。驚你單單係「用手機上課定」，人毋知走哪位去。所以先生上課會問問題，一半係問，一半係在該點名，啞你心思有在無？認真上課个，回答無問題還會講頭就知尾，無用心个乜無問題，平平無問題，這個係麼个就毋知，所以無問題。連先生喊佢回答，佢就像在人間消失，無鏡頭、乜無回答聲，訊息欄上乜無留字，所以佢正經係「用手機上課定」。

線上學習，成就隨在人，逐儕有擇个自由，就係愛對自家个人生負責。對自家未來正經个慷慨，就係現時愛煞猛打拚。今日个佢，成就韶早个佢。

¹ 巧神：音 kiau` shin / kiau` sin` / kiau` siin`；聰慧，屬具特殊能力的聰明。

² 劣拙：音 lod` zhod` / lod` zod`；形容人笨拙魯鈍。

³ 秘訣：音 bi` gied` / bi` gied`；訣竅，指事物的要領、竅門。

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹个背尾升起來，輝煌又晟眼个金線射入天頂。佢箭等該臺一騎斯響歸路个老自行車，來到佢个百果園，還話講今晡日日頭一出來斯到位，算當早了！無胚著，正踏入園肚，隔壁種水梨个阿權哥斯在該大聲嘞了！「喂！日頭恁高了正到位哦，仰做有事？」

唉！佢都恁早了，還輸佢，這阿權哥係歸暗晡毋使睡係無？仰會七早八早斯來到位？心肝還想等，嘴項又毋肯認輸，對嘴斯應佢：「無啦！毋係來做事，係來睨鷓鴣个啦！」

佢个園在山龍園等个窩肚，若堵著像今晡日恁樣个好天時，打早斯會有三、四隻大鷓鴣，在四圍个山嶺頂飛啊飛。

撈阿權哥个嘴鼓都還言打煞，聽著遠遠个所在傳來「咻！咻！」个聲，鷓鴣出來了！阿權哥睨著鷓鴣出來，做等个山園事頭也無心做了，跔等一陣來搯接梨个工人，坐在佢工寮个蔭影²下欣賞這齣大自然个表演。

¹ 鷓鴣背：音 rhiau po zui / rhiau po` zui / iau po` zui；東勢東方山峰名，華語稱鳶嘴山。

² 蔭影：音 lim` rhiang / lim` rhiang / lim` iang；陰影。

睨佢兜閉閉長長个翼胛、搯等熱氣，慢慢迂、定定盤，越迂越高、緊盤緊遠，到尾變做天邊个一粒烏點，就像優雅个天頂王者，對天頂睨等佢兜守護个土地。

成下，會睨著佢兜胸挺挺、目盯盯停在脣頂个樹桎頂高，好點點無聲無哨說斯種往下³，一瞞目轉身又飛往上，尖尖利利个腳爪，夾等一尾挨著神頭个蛇哥，斯一路「咻！咻！咻！」風神哎哎飛入密密个樹林裡肚。

又有成下，睨佢兜在高高个天頂盤等，忽然間，兩片翼胛一收，對天頂直直梓往下，佢心肝肚還想等：「這隻鷓鴣穩死無命了！」毋過，睨佢硬硬都會撞著地泥了，翼胛一閉、利爪一伸，黏時頓恬个一瞞目時間，佢該雙利爪，毋知哪時抓著一條臘身還在該扭啊扭个大老鼠，一轉身又飛到半天高了！

歸陣人睨鷓鴣表演睨到嘴擘擘，有人講：「難怪，在這搭園做恁久事頭，難得睨著蛇，斯係有這兜鷓鴣守護這搭所在，戴在四周圍个老嫩大細正有好安心生活啊！」

³ 種往下：音 zhung` gong` ha / zung` gong` ha；往下俯衝。

編號 5 號

【盜蜂叮著記】李政瞰原作

分盜蜂仔叮著了！

該日晨早去山肚巡水做事，無睺著路脣个竹林肚有大蜂窠，嘛無細義撞著¹該枝竹篙，黏時，惡豺豺²个蜂仔就飛在佢个四周圍，對等佢臉身叮過來。佢睺係盜蜂仔，就著驚煞煞走，一頭退一頭掙臉身掙頭那毛面个蜂仔。退到無蜂仔个所在，正感覺頭那慙慙人怪怪，就遽遽行轉屋下歇睺一下。

無幾久，佢頭那殼、臉身、手髀掙脅下通棚開始疾，頭那殼感覺像雲浮在天嶼，還分人綳到腫腫又緼緼，害頭那昂昂³無法度思考。左手个巴掌嬾腫到像大紅靛，手痺痺、手指尾會伸毋會勾；坐毋核、睡毋得，唉唉唧唧真艱苦，就像戴在陰間樣。

包尾分人送去病院掛急診，聽著佢分十過隻蜂仔叮，醫生認真對佢講，普通人分盜蜂仔叮著二十針以上就可能有生命危險，這種个蜂仔無解毒个血清，卡傷重⁴時會引起各種个症頭，最好愛

先通知你屋下人。醫生安排懸大笏射⁵掙抽血，交代佢先歇一下睺，若係有麼个無堵好愛黏時講。

等佢略略睡一睺後，感覺好當多就想愛轉屋下。毋過醫生愛佢加歇一下觀察睺啊，最好等尿水色正常，若係變烏暗泥色就較麻煩，愛送大間个病院。等加一下，無麼个问题，做得出院了，醫生還係吩咐講：「開个藥愛照三餐食吓，有麼个無鬆爽就愛煞兜倒轉來哦。」

轉屋下換衫褲正知全部叮著十六針，兩隻手髀紅腫，當癢。左手巴掌還係紅腫無感覺、頭那暈暈想愛睡。睡到半夜緊掘，癢到想愛掙皮掀開、掘到骨頭髓。食藥、膏藥無麼个效，堵好有人紹介講臺灣有一款牛樟菇做得強肝解毒，無定著對蜂毒有效，真神奇，食了該日暗晡就當好睡毋會癢。

這下蜂仔叮著个所在結疔了，睺著這兜疔，轉想著該兜蜂仔，當時淨自家一儕人在山肚有幾危險。

¹ 撞著：音 dung do` / dung` do^；接觸、碰到某物。

² 惡豺豺：音 og` sai sai / og` sai` sai`；很凶惡的樣子。

³ 昂昂：音 ngong ngong；頭昏神智不清。

⁴ 傷重：音 shong` diong` / song` diong^；很嚴重。

⁵ 懸大笏射：音 vien` tai` gong sha`；吊點滴，亦可說「吊大笏射」，音：diao` tai` gong` sa。